

DOMINGU XXI TEMPU KOMÚN – TINAN A

Tema

Sentru ba reflesau litúrijika Domingu XXI Tempu Komún nian mak tema sentrá rua ba ezisténsia sarani: Kristu no Kreda.

Evanjellu konvida dixípulu sira atu adere ba Jezús no simu Nia nu'udar “Mesias, Maromak nia Oan”. Husi adezaun ne'e, Kreda moris – comunidade dixípulu Jezús nian, ne'ebé halibur no organiza an haleu Pedro. Kreda nia misaun mak fó sasin kona-ba proposta salvasaun ne'ebé Jezús lori mai. Kreda no Pedro simu kbiit xave sira nian – katak, interpreta Jezús nia liafuan sira, adapta Jezús nia hanorin sira ba dezafiu sira mundu nian no simu iha comunidade ema hotu ne'ebé adere ba Jezús nia proposta salvasaun nian.

Leitura dahuluk hatudu oinsá tenke konkretiza podér “xave sira-nian”. Ema ne'ebé kaer “xave sira” labele uza ninia autoridade atu konkretiza interese pesoál sira no atu impede nia maluk sira ba asesu soin rohan-laek nian; maibé tenke ezerse servisu nu'udar aman ida ne'ebé buka nia oan sira nia di'ak, ho delikadeza, ho domin no ho justisa.

Leitura daruak mak konvite ida atu kontempla Maromak nia rikusoin, sabedoria no siénsia ne'ebé, ho forma misterioza no dalaruma oinseluk husi ema nia hanoin, realiza ninia projetu salvasaun ba ema. Ema presiza de'it entrega an ho konfiansa ba Maromak nia liman no husik atu ninia admirasaun, rekoñesimentu no adorasau nakfilak iha knananuk domin no hahí nian ba Maromak makso'ik no libertadór.

LEITURA I – Is 22,19-23

Profeta Isaías moris iha tinan 760 mK, provavelmente iha Jerusalém. Nia sei foin-sa'e hela bainhira rona Maromak nia bolun atu sai profeta (“iha tinan liurai Ozias nia mate” – Is 6,1 – entre tinan 740-739 mK); no sei hala'o misaun durante tempu naruk (ninia orákulu ikus halo iha sék. VIII eh inísiu sék. VII mK), nu'udar konxiénsia kritical liurai oioin nian, ne'ebé iha tempu ne'e ukun Maromak nia Povu. Husi família noble/datuk, Isaías mak ema matenek, desididu, enérjiku, ne'ebé frekuenta sírkulu sira podér nian no halo parte ba datuk/nobre sira reinu Judá nian. Nia partisipa iha desizaun sira kona-ba oinsá bali Reinu, ko'alia no autoridade ba funsionáriu boot sira (kf. Is 22,15) no liurai sira rasik (kf. Is 7,10). Ne'e la signifika katak nia apoia klase aas sira: ninia atake boot sira dirije ba grupu dominante sira – autoridade sira, juíz sira, rai-na'in sira, polítiku sira, feto sira husi klase aas ne'ebé moris iha luxu eskandalozu (kf. Is 3,16-25)... Nia defende ho laran-manas/paixaun ema ne'ebé terus iha opresaun, oan-kiak sira, feto-faluk sira (kf. Is 1,17), povu ne'ebé governante sira esplora (Is 3,12-15). Nia konvida nafatin nin povu ba konversaun, husu sira atu fila fali ba Jahwéh, atu respeita kompromisu ne'ebé asume ona, aprende hikas moris iha ámbitu Aliansa nian, tau hikas Maromak no Ninia ukun-fuan sira iha sentru moris no istória nian.

Isaías nia liafuan ne'ebé ohin propoin mai ita lori ita ba liurai Ezequias nia época. Iha 714 mK, Ezequias atinje maioridade (tinan konsidera nu'udar adulto) no toma konta ba destinu sira Judá nian. Tanba hakarak halo reforma relijioza no iha independénsia política, Ezequias iha tendénsia ida atu halo aliansa política kontra Assíria (ne'ebé, husik Acáz nia ukun, mantein Judá iha ninia autoridade nia okos). Nu'udar resposta, Senaquerib bá kontra Judá no harahun nia... Iha 701 mK, Jerusalém hetan serku husi Assíria no Ezequias tenke simu submisaun aat liután ida uluk nian.

Epizódiu ne'ebé ohin haktuir mai ita, la haktuir mai ita akontesimentu polítiku boboot iha ne'ebé tempu ne'ebá Judá envolve an. Leitura ohin nian, refere kona-ba epizódiu uma-laran nian, moris doméstiku kadunan/palásiu nian. Shebna no Elyaqîm, funisionáriu boot sira, ne'ebé livru Liurai sira-nian/Reis haktuir iha epizódiu ne'e, iha relasaun ho Senaquerib nia invazaun (kf. 2 Re 18,18.26.37).

MENSAJEN

Ita-nia orákulu dirije, uluknanai ba Shebna, “administradór kadunan nian”. Orákulu fó sai ninia espulsaun husi kargu no substituisaun ho Elyaqîm. Tanba sá? Nia razaun mai iha versíkulu molok ne'ebé la inklui iha leitura ohin nian: Shebna ke'e “ba nia an rate ida iha fatuk-boot nia leten no harii ba nia an mauzoléu ida iha fatuk-boot ne'e” (Is 22,16). Tanba sá mak harii monumentu funeráriu ida hetan kastigu? Tanba, karik hahalok ne'e sinál ne'ebé hatudu Shebna nia orgullu; eh bele mós tanba Shebna uza povu nia osan ba buat ne'ebé la importante iha momentu difisil ba povu.

Shebna sei la hala'o ona ninia funsaun sira. Sei hasai husi nia sinál sira podér nian (hatais, sintu, xave kadunan nian), hodi fó ba Elyaqîm.

Elyaqîm mak simu “podér xave sira” kadunan/palásiu nian. Xave signifikativu duni nu'udar símbolu: mordomu kadunan nian, entre buat seluk tenke halo, nia mak kaer xave sira liurai nia kadunan nian, nia mak administra liurai nia soin sira, nia mak marka bainhira odamatan loke no taka no define sé mak bainaka ne'ebé bele hasoru liurai.

Isaías tau esperansa boot iha Elyaqîm no iha forma oinsá nia sei hala'o nia funsaun sira. Espresaun ne'ebé profeta uza kona-ba Elyaqîm – “nia sei sai aman ba makhorik sira Jerusalém nian no ba uma-kain Judá nian” (vers. 21) – hatudu katak Elyaqîm hala'o ninia servisu autoridade nian ho delikadeza, ho domin, ho justisa... Referénsia ba “ai-riin” (“ha'u sei harii nia hanesan ai-riin iha fatin metin” – vers. 23), revela katak, iha perspetiva Isaías nian, Elyaqîm sei hala'o nia funsaun sira ho firmeza boot.

Iha fatin seluk, ne'ebé leitura ohin la propoin, ita lee katak Elyaqîm nia “servisu” remata la di'ak ... Komentarista ida ne'ebé koñese Elyaqîm nia atividade foti fali ilas “ai-riin” nian atu halo krítika ba ninia hahalok korrupsaun nian: iha “ai-riin” ne'e familiár hotu Elyaqîm nian sadere bá (nobre sira ne'ebé pertense ba família, oan no beioan sira) no “ai-riin” monu tiha, hodi dada sira hotu ne'ebé sadere ba nia monu tomak (kf. Is 22,24-25).

Tanba sá mak istória privada, “fait divers” (notísia) uma-laran nian, propoin mai ita nu'udar Maromak nia Liafuan? Tanba sá istória rua korrupsaun no faan-an nian importante tebes?

Nia prepara ita atu komprende di'ak liután Evanjellu ne'ebé ohin propoin mai ita, define katak sá mak, loloos, “servisu xave sira-nian”, servisu autoridade nian: sai aman ida ba sira ne'ebé ita iha responsabilidade bá, no buka ema hotu nia di'ak ho delikadeza, ho domin,ho justisa.

LEITURA II – Rom 11,33-36

Iha kapítulu 9-11 Surat ba sarani sira iha Roma, Paulo reflète kona-ba kestaun Israel nia asesu ba salvazaun. Kestaun mak ne'e: Israel rejenta oferta salvasaun ne'ebé Maromak halo ba ema sira, liuhusi Jezús Kristu; ne'e katak Israel ho modu definitivu la hetan salvasaun?

Paulo la konkorda. Nia hanoin katak Maromak, ne'ebé promete salvasaun ba Israel labele sai infiel ba Ninia promesa sira. Nia husik atu Israel, iha momentu dahuluk, rekuza salvasaun, atu jentiu sira bele benefisia Maromak nia don sira karik... Maromak “hakerek loos iha liña kleuk sira” no bele husik atu mosu buat ruma aat, atu husi ne'e hasai buat di'ak boot liután.

Maromak nia bolun ba Israel husi ninia ezisténsia kedas, atu sai Ninia Povu, labele troka, no

nia sai objetu espezial ba Maromak nia laran-sadia.

Testu ne'ebé ohin propoin mai ita mak konkluzaun ba Paulo nia reflesaun. Ne'e mak knananuk furak ida hahí nian, rekoñesimentu nian no adorasau nian ne'ebé foti sae Maromak makso'ik ninia planu salvasau nian.

MENSAJEN

Refleto tiha kona-ba Maromak nia projetu salvasau nian no buka atu komprende Israel nia fatin iha projetu ne'e, Paulo, ho admirasaun, kontempla Maromak nia rikusoin, Maromak nia sabedoria no Maromak nia siénsia (vers. 33). Kualidade tolu Maromak nian ne'e lori nia ba esklamasaun no interrogasaun sira ne'ebé hakonu knananuk ne'e (vers. 34-36).

Fundamentalmente, Paulo rekoñese katak Maromak nia hanoin mak mistériu ida no hakat liu ema nia kapasidade komprensau nian. Maromak nafatin "liu" buat ne'ebé ema bele imajina: matenek liu, kbiit-na'in liu, laran-sadia liu... Ema presiza rekoñese de'it ninia ki'ik, ninia limite sira, ninia finitude/moris-badak, ninia kbiit-laek atu komprende Maromak, basá Maromak nia lójika diferente liu husi ema nia lójika. Importante mak ema entrega an iha Maromak nia liman ho konfiansa, simu ho haraik an Ninia Liafuan no buka moris tuir, ho simplisidade no domin Ninia dalan sira...

Fiar-na'in ne'ebé loos mak ida-ne'ebé, maski la komprende ho modu total Maromak nia projetu sira, nia entrega an ho konfiansa iha Ninia liman sira no husik atu admirasaun, rekoñesimentu no adorasau nakfilak iha knananuk hahí nian: "glória ba Maromak ba nafatin. Amén".

EVANJELLU – Mt 16,13-20

Evanjellu domingu ne'e nian situa ita iha Norte Galileia nian, besik mota Jordão nia ulun, iha Cesareia de Filipe (zona atual Baniás nian). Sidade ne'e Erodes Filipe (Erodes Boet nia oan) mak harii iha tinan 2 eh 3 mK, atu fó onra ba imperadór Augusto.

Epizódium ne'ebé ohin propoin mai ita okupa fatin sentral iha Evanjellu Mateus nian. Nia mosu iha momentu ida virajen (turning point) nian, bainhira hahú mosu iha Jezús nia oin destinu krús nian. Liutiha susesu inisial Ninia ministériu nian, Jezús experimeta opozisaun husi líder sira no dezinterese husi parte Povu nian. Grupu ki'ik-oan ida de'it mak simu ninia proposta sira –grupu dixípulu sira-nian.

Nune'e mak Jezús dirije ba dixípulu sira, pergunta ruma kona-ba nia An rasik. Ida-ne'e la'ós atu sukat ninia polaridade to'o iha ne'ebé; maibé liuliu, atu halo sasán sira klaru liután ba dixípulu sira no konfirma sira-nia opsau atu tuir Jezús no konfia iha Reinu.

Mateus nia relatu diferente uitoan husi relatu epizódium hanesan ne'ebé evanjelista seluk halo (Marcos – kf. Mc 8,27-30). Mateus remodela no haluan testu Marcos nian, hodi aumenta afirmasaun katak Jezús mak Maromak nia Oan no misau ne'ebé konfia ba Pedro.

MENSAJEN

Ita-nia testu fahe ba parte rua. Parte dahuluk iha karakter kristolójiku, nia sentru mak Jezús no definisaun ninia identidade nian. Parte daruak iha karakter ekleziolójiku, nia sentru mak Igreja, ne'ebé Jezús konvoka hale'u Pedro.

Iha primeira parte (vers. 13-16), Jezús halo pergunta rua ba dixípulu sira: saida mak ema dehan kona-ba Nia no saida mak dixípulu sira hanoin kona-ba Nia.

"Ema sira" nia opiniaun haree Jezús iha continuidade ho passadu ("João Baptista", "Elias", "Jeremias" eh "profeta ruma"). Sira la kapta Jezús nia kondisaun únika, ninia novidade, ninia

orijinalidade. Sira rekoñese de'it katak, Jezús mak ema ida Maromak bolu no haruka ba mundu ho misaun ida – hanesan profeta sira Testamentu Tuan nian... Maibé sira la hakat liu buat ne'e. Iha “ema sira” nia perspetiva, Jezús mak ema di'ak ida, ema justu, jenerozu, ne'ebé rona Maromak nia apelu no esforsa An atu sai sinál moris Maromak nian, hanesan ema seluk molok Nia (vers. 13-14). “Ema sira” hateten buat barak, maibé la suficiente: signifika katak “ema sira” la komprende Mesias nia novidade, la komprende mós profundidade mistériu Jezús nian.

Dixípulu sira nia opiniaun kona-ba Jezús hakat liu opiniaun komún. Pedro, portavós komunidadade dixípulu sira nian, halo rezume komunidadade Reinu ninia hanoin ho espresaun: “Ita mak Kristu, Maromak moris nia Oan” (vers. 16). Títulu rua haktuir Igreja Mateus nia fiar no katekeze ne'ebé halo kona-ba Jezús. Dehan katak Jezús mak “Kristu” (Mesias) signifika katak nia mak libertadór ne'ebé Israel hein, Maromak haruka atu liberta nia Povu no atu oferese salvasaun definitiva. Ba komunidadade Reinu nian, Jezús la'ós de'it Mesias; nia “Maromak nia Oan” mós. Iha Testamentu Tuan, espresaun “Maromak nia Oan” aplika ba anju sira (kf. Dt 32,8; Sal 29,1; 89,7; Job 1,6), ba Povu eleitu (kf. Ex 4,22; Os 11,1; Jer 3,19), ba membru oioin Maromak nia Povu nian (kf. Dt 14,1-2; Is 1,2; 30,1.9; Jer 3,14) ba liurai (kf. 2 Sm 7,14) no ba Mesias/liurai husi David nia uma-kain (kf. Sal 2,7; 89,27). Ho liafuan ne'e, hakarak dehan ema ida nia kondisaun ne'ebé iha relasaun partikulár ho Maromak, iha ne'ebé Maromak hili no Maromak konfia misaun ida. Define Jezús nu'udar “Maromak Oan” signifika, la'ós de'it katak Nia simu Maromak nia moris, maibé katak Nia moris iha komuñaun totál ho Maromak, dezenvolve ho Maromak relasaun ida iha intimidade kle'an no katak Maromak konfia ba Nia misaun únika ba ema sira nia salvasaun; signifika rekoñese unidade no intimidade profunda entre Jezús no Aman no katak Jezús koñese no realiza Aman nia projetu sira iha ema nia leet. Nune'e, dixípulu sira simu konvite atu komprende Maromak nia mistériu.

Iha segunda parte (vers. 17-19), ita iha Jezús nia resposta ba komunidadade dixípulu sira-nia konfisaun fiar nian, ne'ebé apresenta liuhusi Pedro nia lian. Jezús hahú hodi gaba Pedro (katak komunidadade) ba fiar loos ne'ebé anima nia. Fiar ne'e la'ós Pedro nia méritu, maibé Maromak nia don ida (“la'ós isin no raan mak fó sai ba ó, maibé Ha'u-nia Aman iha lalehan” – vers. 17). Pedro (dixípulu sira) pertense ba kategoria “ema kiak” no “simples” sira nian, nakloke ba Maromak nia novidade, iha fuan disponivel atu simu Maromak nia don no proposta sira (kontráriu ba lider sira – farizeu, doutór Lei, eskriba sira – ne'ebé tuba metin ba sira-nia serteza, seguransa no prekonseitu sira, la hatene loke fuan ba Maromak nia dezafiu sira).

Jezús nia liafuan ba Pedro katak nia mak “fatuk” (naran “Pedro” mak tradusaun grega husi ebraiku “Kephâ” – “fatuk”) iha ne'ebé Kreda sei harii bá. Liafuan ne'e tenke haree iha kontestu konfisaun fiar nian. Mateus hakarak afirma katak baze metin no la nakdoko atu harii Ekklesia Jezús nian mak Pedro nia fiar no komunidadade dixípulu sira-nian ne'ebé professa: fiar iha Jezús nu'udar Mesias, Maromak moris nia Oan.

Atu Pedro bele fó sasin katak Jezús mak Mesias Maromak nia Oan no harii komunidadade Reinu nian, Jezús promete “xave sira Reinu lalehan nian” no kbiit atu “kesi no atu kore”. Ida-ne'ebé kaer xave sira, iha mundu bíbliku, mak “administradór kadunan nian”... “Administradór kadunan” nian, iha knaar mós atu administra liurai nia soin sira, marka oráriu atu loke no taka kadunan/palásiu nia odamatan sira no define sé mak bainaka sira atu vizita liurai... Espresaun “kesi no kore”, ba judeu sira iha tempu ne'ebá, signifika kbiit atu interpreta Lei ho autoridade, atu deklara saida mak bele halo, atu hasai eh hatama hikas ema ruma iha komunidadade Maromak nia Povu nian. Nune'e, Jezús nomeia Pedro ba “administradór” no supervizór Igreja nian, ho autoridade atu interpreta Jezús nia liafuan sira, atu adapta Jezús nia hanorin sira ba nesesidade no situasaun foun sira, no atu simu eh lae membru foun iha komunidadade dixípulu Reinu nian (atensaun: Maromak bolu ema hotu atu

integra an iha comunidade Reinu nian; maibé sira ne'ebé la dispostu atu adere ba Jezús nia proposta labele hetan admisaun).

Entaun Jezús konfia ba ema ida (Pedro) primadu ida, papél ida lideransa absoluta nian (xave, kesi no kore) comunidade dixípulu sira nian? Eh Pedro mak ida ne'ebé representa comunidade dixípulu sira nia lian? Difisil atu halo afirmasaun konkluziva no definitiva. Kbiit atu “kesi no kore”, mosu mós iha kontestu seluk, konfia ba comunidade tomak no la'ós ba Pedro de'it (kf. Mt 18,18). Provavelmente, buat ne'ebé konkretu liu mak haree iha Pedro protótipu dixípulu nian; nia representa comunidade ne'ebé halibur hale'u Jezús no haklaken nia fiar iha Jezús nu'udar “Mesias” no “Maromak nia Oan”. Ba comunidade ne'ebé Pedro representa ne'e mak Jezús konfia xave sira Reinu nian no kbiit atu simu no ezklui. Ida ne'e la hasai valór ne'ebé Pedro iha nu'udar figura referénsia nian ba sarani dahuluk sira no dezempeña papél ida importante liu iha animasaun Igreja ne'ebé foin moris, liuliu iha comunidade sira Síria nian (komunidade sira Mateus nia Evanjellu nian).